

ODOEJE NIWAKATE TESSALONICEENSITEDI

Aca nigotaga Tessalônica aninoa icoa enaanaga manitaga. Jigidiaagitedice ni dagawadi romaanotedi. Paulo jigijaa odoejegi liigexegi Aneotedogoji ane yatematitedibece nibodicetedi anele aneetece Cristo, odaa jegeo lapo nigijo anonakato Goniotagodi. Icoa judeutedi ane nigeladimigipitigi Tessalônica eliodi modakapetege nibodicetedi anele, odaa eliodi moiatetibece Paulo ijaa Silas, codaa ijo moniwilotiniwace. Nigidiaagidi Paulo ja imonyaticogi Timóteo Tessalônica migo yaxawatiogi loiigi Cristo meo mepaanaga ili eliwagatakanegegi. (Awiniteloco Atos 17.1-10).

Paulo yatemati nigica anodaagee nige dopitedijo Goniotagodi. Dogetetibigimece Aneotedogoji leegodi mele moi kee me niwinigijedipi eledi nigeladimigipitigi Tessalônica, leegodi meliodi me dinemaatiwage, codaa moyiwagadi nibodicetedi anele. Paulo eo monalagatacibige nigijo ane lewiga me igenaga nigijo maleegidiaagite miditaga. Odaa jigijaa niwinigijegi. Paulo yalagata meliodi me yemaa loiigi Cristo, odaa naga dagadiaagica libodigitigi, odaa ja iige Timóteo migo iwi migalee odioetece Jesus. Paulo aagaga diigaxinagatece nigica anejinaga me godewiga anepaga yocaganegge Aneotedogoji, codaa miditawece nigomaga monibeotege lanokegi Goniotagodi. Owidijedi lotaga Paulo inokinoa niladeenegeco.

Paulo yecoaditibige Tessaloniceensitedi

1 ¹Ee Paulo, Silas, iniaa Timóteo, jiwakateenagatibigagaji nagadi godiwakate ane emegege jidi. Jiwakateenagatibigagaji anakaami gonioxoadipi, ane iwagatiteti waji Goniotagodi manitaga nigotaga Tessalônica, akaami ane gadexocitege Aneotedogoji Godiodi, iniaa Goniotagodi Jesus Cristo.

Jemaanaga Aneotedogoji Godiodi, codaa me Goniotagodi Jesus Cristo midioka limedi meletagadomitiwaji, codaa mowo mele gadaalegenali.

**Paulo diniotagodeetibigimece Aneotedogoji leegodi eliwagatakanegegi,
codaa anodaageeta lewiga Tessaloniceensitedi**

²Idioka limedi me iniotagodeegatalo Aneotedogoji leegodi akaamitaweceti waji, codaa jipokagataloti waji nigina me jotaganegenaga Aneotedogoji. ³Nigina me jotaganegenaga idioka limedi me

godalagatibigagaji lodoe Aneotedogoji Godiodi. Godalagatibigagaji nigina mawii Aneotedogoji ane yemaa leegodi gatiwagatakanegegi, codaa anodaagee meliodi maxawani eledi oko leegodi manemaanitiniwace, codaa me aatege niginoa ane dakaketagadomitiwaji leegodi manibeoonitege lanokegi Goniotagodi Jesus Cristo. ⁴Gonioxadipi, jowoogotaga me gademaanitetiwaji Aneotedogoji, codaa me gadiomagatiticoace makaami nepilidi. ⁵Jowoogotaga Aneotedogoji me gadiomagatiticoace leegodi nigijo naga jelogotagatagawa gobodigi anele ane icogotigi miniwataga Aneotedogoji, ajelogotagatedagawa notaga ane goneleegiwa lotaga, pida Aneotedogoji najigotedogowa loniciwaga nigina me jelogotagatagawa nibodicetedi anele, Aneotedogoji Liwigo godiigaxitece anejalagatigi gogegi, codaa iniaagini ikeetagawatiwaji nigijoa godotaga mewi. Akamagakaamitiwaji owoogoti anodaagejinaga me godewiga nigijo midiaagejonaga gadiwigotigitiwaji me gadaxawanegegi. ⁶Odaa jaganowikitogowa anodaagejinaga me godewiga, codaa jagaga iwitece anodaageeteda Goniotagodi malee yewiga digoina iigo. Nigijo nagabaategetiwaji godatematiko, odaa Aneotedogoji Liwigo eo maniniitibecetiwaji, idaagida meliodi mawikodeetiwaji leegodi nigijo anodakapetagagi. ⁷Odaa nigida anenitiwaji jagakaami niwinigijedipi iditawece nigidi anoyiwagadi Goniotagodi ane ligeladi niigotedi Macedônia aniaa Grécia. ⁸Igaataga agidioka adeegiticogitiwaji lotaga Goniotagodi niigotedi Macedônia aniaa Grécia. Pida jagadeegitedicogi inoatawece nipodaga, codaa jogodibodicetibige anodaagenitiwaji meliodi manakatonni Goniotagodi. Joanigidaa leegodi me dagadiaa leeditibige daga jelogotagatibige anodaagee gatiwagatakanegegi. ⁹Igaataga iditawece odibodicetibige mele mabaatogogitiwaji, codaa modi nigikanitiwaji magaatalo niginoa niwicidi, odaa jagabaatema Aneotedogoji ane yewiga, codaa anepewi. ¹⁰Nigidi oko eledi odibodicetibige manibeoonitibigege lanokegi Jesus, Lionigi Aneotedogoji, Nigijoa Aneotedogoji aneote me yewigatace. Jigijaagijoa nigicota me dopitedijo icogotedibigimece ditibigimedi, odaa nogatedice lélagatedogodomi Aneotedogoji leegodi gobeyacegeco nigica noko nige iwi anigote codaa me iloikatidi eledi oko leegodi libeyacegeco.

Icoa libaketedi Paulo digoida Tessalônica

2 ¹Inioxadipi. Akamagakaamitiwaji owoogoti nigijo me idaliigatagawa, leegodi me iwagati ane jelogotagatagawatiwaji, odaa agoko abaagegegipi me idaliigatagawa. ²Codaa owoogotitiwaji moyametibigogoji, codaa metigodiweenigetice nigeladimigipitigi nigotaga Filipos maleedigicatibige daga idaliigatagawa. Eliodi oko, oko nakapetegi, pida Aneotedogoji eote mabo godaalegena me jelogotagatagawa gobodicetedi anele ane icogotibigimece miniwataga. ³Nigijo naga gadiladeenegegitiwaji mabaatege godatematiko, agica daga joleegatibige me gadinaalenegegitiwaji, otegexaagaga joleegatibige me jaoga mabataatiwaji, otegexaagaga joleegatibige mawiite gadakataga

ane beyagi. ⁴Pida idioka limedi me jelogotaga Aneotedogoji ane yemaa, me jocaganagatalo, Nigijoa ane naditediwe godaalegenali. Ajoleegatibige me jocaganagatiogi goneleegiwadi nigijo me jelogotagatedibece gobodicetedi anele, leegodi Aneotedogoji godiomagaditedice codaa jegepaa najigotedogowa niginoa gobodicetedi anele. ⁵Codaa aagaga igenaga mowoogotitiwaji nigijo naga ejogotagawatiwaji me jatematitedagawa gobodicetedi anele, ajoleegatibige daga gadamenegegitiwaji, otegexaagaga joleegatibige me gadinaalenegegitiwaji me inigaanyagatece ganinyeelo. Codaa Aneotedogoji iniwa me nakataganaga nadi anejinaga. ⁶Otegexaagaga joleegatibige degetigodiwenigide nigina oko, otegexaagaga akaamitiwaji, domigetaga eledi oko. ⁷Nigida moko ida gonagatetigi leegodi moko liigexedi Cristo. Pida ajemaanaga me jibakenaga gonagatetigi daga gadiigenegegitiwaji manajicitogowa niginoa ane jopoogatibige me godewiga. Pida aninigatagawatiwaji liciagi nagana eniodo anigotiogi lionigipi me dowediteloco, jikeenagatagawatiwaji me gadiwikodenegegi. ⁸Nigida moko eliodi me gademaanegegitiwaji. Joanigida leegodi aginoka jemaanaga me jatematiigatedagawatiwaji nibodicetedi anele ane icogotibigimece miniwataga Aneotedogoji, pida jagaga godigo codaa me godeleotagadomi me gadaxawanegegi. ⁹Inioxoadipi. Ejimaleeganalakitibige meliodi me jibaaga, codaa me idinoniciwagataga me jibaaga noko, codaa menoale jaogatibige me jakataga ane jopoogatibige me godewiga, jaogatibige me daga godedianegegitece ane jopoogatibige, nigijo maleegidiaagejonaga makaamitagatiwaji me jatematiigatedagadomi nibodicetedi anele.

¹⁰Akaami nakataganaditiwaji, codaa me Aneotedogoji eledi nakataganaga anodaagejinaga me godewiga me godegenaga, agica gobatiigi, oada agica ane yakadi me dilaagetetogowa nigijo maleegidiaagejonaga makaamitagatiwaji ane iwagati Goniotagodi. ¹¹⁻¹²Owoogoti me joenagatibigagajitiwaji oninitecibeci micataga nigina eniodi anigota me yoetibigo nigina lionigi. Codaa idioka limedi me gadajacagategegitiwaji, codaa me gadoniciwagategegi, codaa me jiladeenaga oninitecibeci jaogatibige me yocaganege Aneotedogoji anodaagee me yewiga. Igaataga Aneotedogoji eniditedagawatiwaji me gadewikitema nige limedi ninioxigi, codaa eote mawanitege me gadiwenigideni.

¹³Digawini eledi ane leegodi midioka limedi me iniotagodeegatalo Aneotedogoji. Iniotagodeegatalo leegodi nigijo nagajipaatalo Aneotedogoji lotaga ane jelogotagatedagawa, akaamitawecetiwaji agabaatege nigijoa notaga micataga daga lotaga goneleegiwa, pida abaatege mewi me notaga ane icogotedibigimece miniwataga Aneotedogoji. Odaa nigidiwa notaga ja iigi anodaagenitawatiwaji me gadewiki, akaamitawece ane iwagati Goniotagodi. ¹⁴Inioxoadipi. Ane lawikodigi loiigi Aneotedogoji digoida Judéia ane nepilidi Jesus Cristo, akaamitiwaji inaa aagaga gadawikodico. Owo mawikodee nigina akamaga gadoiigi, liciagi lawikodigi nigijo anoyiwagadi Goniotagodi digoida Judéia me nawikodeega leegodi eletidi judeutedi. ¹⁵Nigidiwa judeutedi jegepaa oyeloadi Goniotagodi Jesus, codaa eledi onigodi Aneotedogoji liotaka nigijo jotigide anoyelogoditedibece

lowooko. Codaa moko eledi etigodiatetibece. Nigidiwa judeutedi owotibige Aneotedogoji me yelatetema, codaa odakapetege inatawece oko. ¹⁶Nigidiwa judeutedi idioka limedi modoletibige moyolitogogi me jelogotagatiogi nibodicetedi anele eledi oko ane daga judeutedi meote Aneotedogoji lewiga. Odaa nigida anee jegepaanaga inoa libeyacegeco. Aneotedogoji ja nilagaditedibigege libeyacegeco, agalee leegi odaa icota me dagadiaa ika me nibataaga. Ja nipegi noko me iloikatidi.

Paulo domaga doletacibige me dalita nigotaga Tessalônica

¹⁷Gonioxadipi. Nigijo naga jawalacagaticoace nigijoa nokododawaanaga, catiwedi godowoogo baadaga jawalacagatiwage, pida moko oko бага jawalacagatiwage. Odaa eliodi me gadiategegitiwaji, codaa idioka limedi me joleegatibige gonimawenegegi me idaliigatacagawatiwaji. ¹⁸Jigijo me godowoogo me idaliigatagawa. Ee Paulo, elioditibece me domaga jema me idalitagawatiwaji, pida Satanás idioka limedi me idibeyacagaditibece. ¹⁹Eliodi me jemaanaga me gadategegitiwaji, leegodi me inibeonagatege me gadikeenegegitalo Aneotedogoji nigica noko nige dopitedijo Goniotagodi, odaa eliodi me godinitibece akaami leegoditiwaji nigica noko lodoe Goniotagodi Jesus Cristo. Odaa ja jibagatege gonagajegi miniwataga Goniotagodi ane liciagi nogeedi nigina nalokodegecajo baanaga dinigaanye me dinibaleece, odaa jogoyajigo nogeedi. ²⁰Odaa ewi meliodi me idinanenagatibece codaa me godinitibece leegodi akaamitiwaji.

3 ¹⁻²Nigijo naga dagadiaa jakataga miniga makaamitagatiwaji, agalee jibogatege me digicata gobodigitibigagajitiwaji. Odaa ja godowoogo mokokotece me godeyagatini manitaga nigotaga Atenas, odaa ja jimonyaagatagawa gonioxa Timóteo. Igaataga Timóteo godaxawatece Aneotedogoji libakedi digoina anejonaga me jelogotagatedibece gobodicetedi anele aneetece Cristo. Jimonyaagatagawatiwaji migo me gadoniciwagati codaa me gadaxawani mepaanaga anakatoni Goniotagodi, ³amaleegaga agica ane dinalalacetema eliwagatakanegegi leegodi lawikodico. Igaataga akamagakaamitiwaji owoogoti Aneotedogoji mepaa ika me jawikodeega digoina iigo. ⁴Nigijo maleegidiaagejonaga makaamitagatiwaji, eliodi me jaogatibiga gabodigi micota metigadiatenitibecitiwaji. Odaa owoogotitiwaji micota nigida niciagi anejinagatibigagawa. ⁵Joanigidaa leegodi naga jakadi me leeditibige me jimonyatagawatiwaji Timóteo jaotibige me jowoogodi migaleeganakatoni Goniotagodi, leegodi agalee jibotege me dagadiaagica gobodigitibigagajitiwaji. Yaaditibigagajitiwaji daantigica Satanás me dineetagawa, oditaga jigikanitiwaji me iwitece Goniotagodi, idoiigatibige nigijo gobakedi ane jaoga digoida makaamitagatiwaji daatigicata aneletema.

⁶Pida natigide Timóteo negeno me icogotigi makaamitagatiwaji, ica mele gobodigitibigagajitiwaji ane nadeegitogowa, natematitogowa monaleegidaageni

me iwagati Goniotagodi, codaa midioka limedi madinemaanitiwaji. Natematitogowa midioka limedi mele me gadalakitibigogoji, codaa meliodi memaani magaga godategegi, digo anejinaga me godipegegedi me gadategegitacetiwaji. ⁷Inioxoadipi. Joanigidaa leegodi naga godoniciwaditace leegodi maleegidaageni me iwagatitetiwaji Goniotagodi, idaagida me jakapagatege niginoa ane dakapetogodomi codaa me godawikodico. Idioka limedi me godoniciwadi nigina me jowoogotaga maleeganakatonni Goniotagodi. ⁸Codaa godinitibece me jibaagatema Goniotagodi nigina matitetiniwace, codaa nigina me digikanitiwaji me iwagati Goniotagodi. ⁹Eliodi me iniotagodeegatalo Aneotedogoji akaamitiwaji leegodi, codaa iniotagodeegatalo Aneotedogoji leegodi meote me godinitibece lodoe, akamagakaamitiwaji leegodi. ¹⁰Enoale, codaa me noko, eliodi me jipokagatalo Aneotedogoji manitawece godaalegena me jakataga me gadategegitacetiwaji, amaleegaga jakataga me jigaxinagatagadicitiwaji niginoa niigaxinaganegeco anoyalagata gotiwagatakanegegi analee dogowoogotiteda, codaa amaleegaga gadaxawanegegi mepaanaga iwagatitetiwaji Goniotagodi.

¹¹Eliodi me jemaanaga miniaaginiwa Aneotedogoji Godiodi, codaa me Goniotagodi Jesus Cristo meote me jakataga me idaliigatacagawatiwaji. ¹²Jemaanaga Goniotagodi meote midioka limedi mepaanaga adinemaanitiwaji, codaa memaani inatawece oko, liciagi aninigatagawa me gademaanegegitiwaji. ¹³Joanigidaa Goniotagodi Jesus meote gadoniciwaga midioka limedi me gadewikitema iniokiniwateda Aneotedogoji, me digicata gabatiigi lodoe Aneotedogoji Godiodi, nigica noko nige dopitedijo Goniotagodi Jesus lixigagawepodi ijotawece nigijo ane nepilidi, ane iomagaditedicoace mepoka nepiliditeda.

Ica anodaagejinaga me godewiga aneo Aneotedogoji me ninitedibece

4 ¹Gonioxoadipi. Nigina natigide jidikonagatibigagaji owidije liwai godotaganagaxi. Ja jigaxinagatagadicitiwaji ane leeditibige me eni me gadewiki aneo me ninitedibece Aneotedogoji, analeegeni nigina natigide. Pida jibakenaga nagatetigi Liboonagadi Goniotagodi Jesus me jipokagatagawatiwaji codaa me gadiladeenegegi mepaanaga adinoniciwagatitiwaji me gadewikitema ane yemaa Aneotedogoji. ²Igataga owoogoti nigijoa niigaxinaganegeco ane jajicagatedagawatiwaji, nigijo me jibakenaga gonagatetigi ane najigotedogowa Goniotagodi Jesus. ³Nigijoa niigaxinaganegeco oikee Aneotedogoji ane yemaa me awiitetiwaji. Yemaa matamitege inoatawece ane beyagi, codaa me daga gadoomatewatiwaji ane daga gadodawa. ⁴Aneotedogoji eledi yemaa moninitecibeci yowoogodi me dowediteloco lodawa anodaagee nigina oko ane yemaa me yewigatema iniokiniwateda Aneotedogoji, codaa midioka limedi me deemitetibige lodawa. ⁵Agele daga yametibigo lodawa degego liciagi nigina oko ane dogoyowoogoditeda Aneotedogoji, anepaga inoka odoletibige mowo nigica anepoka eletema. ⁶Aneotedogoji ayemaa digica aneo ane beyagitema nioxoa oditaga ibeyacagadi ladonegegi. Igataga jigijo mejinagatagawatiwaji codaa me

gadiladeenegegitece Goniotagodi me ilokatidi inatawece oko ane ibeyacagadi ladonegegi nioxa. ⁷Igaataga Aneotedogoji ageniditedogowa daga godoomatewa ane daga gododawa, pida eniditedogowa me jatamagajogotege inoatawece ane beyagi, codaa yemaa miniokiniwateda me godewigatema. ⁸Nigica oko ane daga niwoditema godiigaxinaganegeco, odaa agoneleegiwa ane dogodibatege, pida Aneotedogoji ane dogodibatege, Nigijoa ane najigotedogowa Liwigo ane yapidi.

⁹Agalee leeditibige daga jidikonagatibigagaji me gadiigaxinegegi me leeditibige memaani ganioxoadipi, leegodi Aneotedogoji ja iigaxitedagadicitiwaji me leeditibige madinemaanitiwage. ¹⁰Ewi nigikeeni memaani iditawece gonioxoadipi ane ligeladi nipodigi Macedônia. Pida jipokagatagawatiwaji moleetibige mepaanaga dagaxa memaani nigidi gonioxoadipi. ¹¹Jipokagatagawatiwaji midioka limedi moleetibige me gadilakiitege okanicodaagica oko, codaa jinagawatitaeledi oko lewiga, codaa abaatiwaji makati anopootibige me gadewiki, odaa iwitece ijoatawece nigijoa baanaga gadiladeenegegitecetiwaji. ¹²Nige iwitece nigijoa ane gadiladeenegegitecetiwaji, odaa nigina oko ane dogoyiwagaditeda Goniotagodi jogodeemitetibigagaji, codaa agica anawaletigi liwa nigina mido anopootibige.

Lanokegi Goniotagodi nige dopitedijo

¹³Gonioxoadipi. Jemaanaga mowoogoti anewi anodaagee nigijoa anyiwagadi Goniotagodi baanaga nigo, amaleegaga agakaamitiwaji agecagalodipi anee nigina oko ane dogonibeotege me newigatace. (Igaataga nigida moko anejiwagataga Goniotagodi nigina naga godeleo liciagi nigina me jiotaga.) ¹⁴Nigida moko ejiwagataga Jesus me yeleo, odaa nigidiaagidi ja yewigatace. Joanigidaa leegodi mejiwagataga Aneotedogoji meote me lixigagawepodi nige dopitacedijo Jesus nigijoa anyiwagadi Goniotagodi baanaga nigo.

¹⁵Niginoa ane jelogotaga liigaxinaganegeco Goniotagodi aneetece nigijoa anyiwagadi Goniotagodi baanaga nigo. Nigida moko anepagalee godewiga nigica noko nige dopitedijo Goniotagodi, nigida moko agoko odoejedipi me jakapagatege Goniotagodi ajibanooonagatece odoe nigijoa anyiwagadi Goniotagodi baanaga nigo. ¹⁶Igaataga nigica noko Goniotagodi diigenatakate ica napaawaga ane igedi, nigica ane diigenataka me dapaawe niaanjo Goniotagodi ane dagaxa me gonegegi, odaa aca goloneeta ane dodenaga icogoticogi layaagegegi miniwataga Aneotedogoji. Odaa Goniotagodi ja dinikatedini icogotedibigimece ditibigimedi. Odaa ja newikatiditediniwace nigijoa anyiwagadi Cristo baanaga nigo. ¹⁷Odaa nigidiaagidi nigida moko analee godewiga ja jawanagatege nigijoa aneniwagatakanaga baanaga nigo odaa ja newigatace midiwa loolatedi. Odaa okotawece jakapagatege Goniotagodi digoida ditibigimedi. Odaa idiokaanaga limedi me idejonaga miniwataga Goniotagodi. ¹⁸Enice atikanitalo niginoa notaga anajipaatalotiwaji madinaxawani amaleegaga idioka limedi me gadoniciwatitiwaji.

Leeditibige me idinowetagatege lanokegi Goniotagodi

5 ¹ Inioxoadipi. Agalee leeditibige daga jidikotibigagaji daga idalagata anodaagee nigicoa nokododi nigicota me dopitedijo Goniotagodi. ² Akamagakaami igenaga mowoogotiwaji me digica ane yowoogodi nigica noko nige dopitedijo Goniotagodi, micataga nigina me digica ane yowoogodi nigica noko micotio olicegegi aninoka dolictigi enoale. ³ Nigodi nigina oko, “Agica ane godigecagalege, daxixe, agicaantokaagini ane idoiigatibige.” Pida codidigida, nigenoteloce ane yaagadi. Agica ini ane yakadi me iwoko nige limedi Aneotedogoji me iloikatidi oko ane dogoyiwagaditeda, macataga nagana iwaalo naga nipegi me dinigaje oada aiwoko nigida lawikodigi. ⁴ Pida, inioxoadipi, nigida makaamitiwaji agideoni nexocaga, codaa nigica noko nige dopitedijo Goniotagodi agadawelagatitiwaji, micataga olicegegi anenotio me degejinagatibige. ⁵ Akaamitawecetiwaji ida anenitege nilokokena Aneotedogoji, codaa jibaaga mani lokokena. Nigida moko agica anejinagatege enoale, otegeaxagaga nexocaga. ⁶ Odaa ayakadi dogoko abacigegipi micataga daga jiotaga malee godewigatema Goniotagodi, anee nigina oko ane dogoyiwagaditeda Goniotagodi ane dogoyewigatema. Pida leeditibige moko nigina oko ane niwoditibigiwaji, codaa ele me idinajacagataga anejinaga me godewigatema. ⁷ Igaataga nigina ane diote, diotetigi enoale, codaa nigina ane yemága, yemágatigi enoale. ⁸ Pida nigida moko bigida anejinagatege noko, oada leeditibige me idinajacagataga. Nigida moko nigidioka limedi me jinakatonaga Goniotagodi, codaa me jemaanaga okanicodaagica oko, oada idinowetagatema godaxakawa, macataga aca oecagaxi elipogo iodagawa ane yolitege ninyaagi nigina laxakawa naga domegeo anigota. Codaa nige inibeonagatege me dopitedijo Goniotagodi, ja idowetagateloce godacilo me daga jowooga ane beyagi, micataga ica iodagawa lamakaladi gapilecege ane dowediteloce lacilo me digica ninyaagi. ⁹ Igaataga Aneotedogoji agodiomagaditedice daga godiloikatidi leegodi nigino a gobeyacegeco, pida godiomagaditedice me najigotedogowa gela godewiga ane yemaa me najigotedogowa. Jakatagatace me godewiga leegodi nigijo loenatagitedogodomi Goniotagodi Jesus Cristo. ¹⁰ Igaataga Cristo yeleotedogodomi eotedibige me jakataga me godewiga digoida miniwataga, icaagica nige naga godeleo, domigalee godewiga nige dopitedijo Goniotagodi, pida idioka limedi me idejonaga miniwataga. ¹¹ Enice oleetibige midioka limedi moniciwagati eledi ganioxoa, codaa axawani amaleegaga ili gatiwagatakanegegitiwaji, nigijo anenitiwaji jotigide.

Niladeenaganegeco

¹² Gonioxoadipi. Jipokagatagawatiwaji me eemiteetibige nigidi anele modibatagadomi, nigidiwa goneleegiwadi liomagataka Goniotagodi me gadaciloditiwaji, codaa metigadiigaxinitece anodaageni me gadewiki.

¹³Leeditibige meliodi me eemiteetibige nigidiwa goneleegiwadi, codaa memaani, leegodi nigida libakedi. Codaa oleetibige me gadilakiitiwagetiwaji.

¹⁴Gonioxoadipi. Digawini ane jiladeenagatagadici: Iigeni nigina oko nigojigipi me nibaaga, oniciwagati nigidi oko ane dagadiaa oilidagadi modiotece Goniotagodi, axawani nigidi oko ane digica loniciwaga modinajacagaditema lakataga ane beyagi, codaa adinatiitioyi iditawece nigidi oko. ¹⁵Adinowetitiwaji adigica ane doojete nigina mowo ane beyagitema. Pida begele midioka limedi moleetibige inokina aneletema inatawece oko.

¹⁶Oleetibige midioka limedi maniniitibecetiwaji. ¹⁷Idioka limedi moleetibige motaganegeni Aneotedogoji. ¹⁸Oleetibige midioka limedi me aniotagodeetalotiwaji Aneotedogoji, aibeyacagadi nigica aneni, domigele, ogoa, domige ida ane dakaketagadomi. Jigidaa ane yemaa Aneotedogoji mejinaga, leegodi me godexogotege Jesus Cristo.

¹⁹Jinaga domaga abeyacagati libakedi Aneotedogoji Liwigo ane yemaa meo gadiwigotigitiwaji. ²⁰Codaa jinagakaamitiwaji nigina ane digica mowote lotaga nigina anoyelogoditedibece lowooko Goniotagodi. ²¹Pida awinitece inoatawece notaga amaleegaga owoogoti nigewi niginoa notaga anoyalagatalo, odaa abaatege inokina anele. ²²Codaa oxaxinitiwaji inoatawece niginoa ane yakadi modi me beyagi mawii nigina eledi oko.

²³Aneotedogoji eote mele godaalegenali. Odaa Iniaaginiwa jipokotalo me gadatamagateenitetege inoatawece ane beyagi, me gadewikitema. Codaa jemaa me doweditedeloco idatawece gadewiga: Gadiwigo, gadolaadi, codaa me niginoa ane eemiteetece, me digica ane yakadi me dinanimagatagawa nige dopitedijo Goniotagodi Jesus Cristo. ²⁴Aneotedogoji nigijoa aneniditedagawa me gadewikitema eote nigijo ane ligegi, codaa doweditedagalocotiwaji.

²⁵Gonioxoadipi. Ipokitogoloco nigotaganegeni Aneotedogoji magaga godaxawa. ²⁶Nigina madinicenitiwaji, adiniceni digo anodaagee me dinice nigina dinoiigiwepodi.

²⁷Jibake nagatetigi Liboonagadi Goniotagodi me jiigetagawa malomegenitema iditawece gonioxoadipi nagadi notaganagaxi ane jiwakateetibigajitiwaji.

²⁸Jemaanaga Goniotagodi Jesus Cristo midioka limedi meletedagadomitiwaji. Odaa jigidaagee (Amém).